

Во Вторник 2-я седмицы вечера,

Стихиры господина Иосифа, глас 1:

Подобен: Прехвальнии мученицы:

На Кресте распростерл еси Христе, / пречистеи руке Твои, / собирая концы. Темже зову Ти: / расточенный ум мой собери, / плененный, влекомый страстьми, / и страданий Твоих общника мя покажи, / воздержанием всего очищена.

Дети обострив иногда пост, / показа сильнейшия, якоже пишется, / огня палящаго. / Смиренная душе моя постися, / вжигающи в себе Владычнее возлюбление, / имже будущия возможеши избежати геенны, / и страсти попалити всепагубныя.

Ина стихира господина Феодора, глас 3:

Подобен: Доблии мученицы:

Время веселое поста, / темже чистоты световидныя, / и любве чистыя, / молитвы светозарныя, / и всякия иныя добродетели / насытившеся богатно, светло возопиим: / Кресте Христов всесвятый, / возрадивый сладость жизни, / всех чистым сердцем тебе поклонитися сподоби нас, / очищение нам дая и велию милость.

И Минеи 3. Слава, и ныне, Богородичен.

Прокимен, псалом 27, глас 6: Спаси Господи люди Твоя, и благослови достояние Твое.

Стих: К Тебе Господи, воззову Боже мой.

Бытия чтение. [Глава 4, ст. 8 – 15.]

Рече Каин ко Авелю брату своему: пойдём на поле. и бысть внегда быти им на поли, воста Каин на Авеля брата своего, и уби его. И рече Господь Бог ко Каину: где есть Авель брат твой? и рече, не вем: еда страж брату моему есмь аз? И рече Господь: что сотворил еси сие? глас крове брата твоего вопиет ко Мне от земли. И ныне проклят ты на земли, яже разверзе уста своя, прияти кровь брата твоего от руки твоея. Егда делаеши землю, и не приложит силы своя дати тебе: стений, и трясыйся будеши на земли. И рече Каин ко Господу Богу: вящшая вина моя, еже оставится ми. Аще изгониши мя днесь от лица земли, и от лица Твоего скрыюся, и буду стена и трясыйся на земли, и будет всяк обретаяй мя, убьет мя. И рече ему Господь Бог: не тако, всяк убивый Каина, седмижды отмстится. и положи Господь Бог знамение на Каине, еже не убити его всякому обретающему его.

Прокимен, псалом 28, глас 7: Господь крепость людем Своим даст, Господь благословит люди Своя миром.

Стих: Принесите Господеви сынове Божии:

Притчей чтение. [Глава 5, ст. 1 – 15.]

Сыне, моей премудрости внимай, к моим же словесем прилагай ухо твое. Да сохраниши мысль благую: чувство же моих устен заповедает тебе. Не внимай злей жене: мед бо каплет от устен жены блудницы, яже на время наслаждает твой гортань: Последи же горчае желчи обрящещи, и изощрену паче меча обоюду остра. Безумия бо нозе низводят употребляющих ю со смертью во ад, стопы же ея не утверждаются: На пути бо животные не находят, заблужденна же течения ея и неблагоразумна. Ныне убо сыне, послушай мене, и не отриновенна сотвори моя словеса: Далече от нея сотвори путь твой, и не приближися к дверем домов ея: Да не предаст иным живота твоего, и твоего жития не милостивным. Да не насытятся инии твоя крепости, твои же труды в дома чуждыя внидут. И расквесиши на последок твой, егда иструтся плоти тела твоего, и речеши: Како возненавидех наказание, и от обличений уклонися сердце мое? Не послушах гласа наказующаго мя, и ко учащему мя не прилагах уха моего: Вмале бех во всяком зле посреде церкви и сонмища. Сыне, пей воды от твоих сосудов, и от твоих кладенцев источника.

На стиховне самогласен дне.

Глас 3:

Плотию распныйся Господи, / и с Собою распный ветхаго нашего человека, / коием же прободен в ребра, / и человекогубителя спрободый змия, / пригвозди к страху Твоему плоти моя, / и любовию Твоею уязви мою душу: / да Твою созерцаю страсть, / воздержно совершу поста определение, / не точию чрево, / но и другия греха входы удержавая: / сокрушение же сердца, и духа смирение пожру Тебе, / о преждебывших моих согрешениях, / от нихже мя избави Человеколюбче.

Стих: **К** Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Плотию распныйся Господи, / и с Собою распный ветхаго нашего человека, / коием же прободен в ребра, / и человекогубителя спрободый змия, / пригвозди к страху Твоему плоти моя, / и любовию Твоею уязви мою душу: / да Твою созерцаю страсть, / воздержно совершу поста определение, / не точию чрево, / но и другия греха входы удержавая: / сокрушение же сердца, и духа смирение пожру Тебе, / о преждебывших моих согрешениях, / от нихже мя избави Человеколюбче.

Стих 2: **П**омилуй нас Господи, помилуй нас, яко по многу исполнихомся уничижения: **наипаче наполнися душа наша поношения гобзующих, * и уничижения гордых.**

Мученичен: **П**ророцы, и апостоли Христовы, / и мученицы, / научиша пети Троицу Единосущную, / и просветиша языки заблуждшия, / и общники ангелов сотвориша сыны человеческия.

Слава, и ныне, Крестобогородичен.

Подобен: Велия мученик:

Видящи из Тебе Рождшагося Всенепорочная, / висяща на Древе, / рыдала еси вопиючи: / превозжеленное Мое Чадо, / где Твоя зайде доброта светоносная, / яже удобри человеческое естество?

В СРЕДУ 2-Я СЕДМИЦЫ НА УТРЕНИ, ТРОИЧНЫ.

По 1-м стихословии седальны Крестны Осмогласника.

По 2-м же стихословии седальны настоящия, глас 1:

Христе, на Кресте простерся, / умертвился еси, / умертвивый врага и началозлобнаго змия, / оживив же угрызением онаго умершия. / Темже молюся: / умерщвленную душу мою Спасе оживи, / в молитве и посте к Тебе взирающую. [Дважды.]

Крестобогородичен. Подобен:

Яко виде на Кресте Агница, / Тебе Агница висяща Христе, / посреде злодеев, / вопияше слезящи, и горце рыдающи: / Чадо любезнейшее, / что зримое чудо? / Мати Пречистая, / живот всемирный, сие предрекла еси, познается.

По 3-м стихословии седален, глас 3.

Подобен: Красоте девства:

Песней трубою вострубим, / день нарочитый проходяще, / воздержания время, и воззовем вопиюще: / сие жизнь нашу в мире прорасти, / увядившее невоздержания страсть. / Силою Креста Твоего Христе Слове, / в сем рабы Твоя сохраняй. [Дважды.]

Крестобогородичен:

Поносную Щедре смерть распятием / волею претерпел еси: / Егоже рождаша Тя Христе зрящи, / уязвляшеся утробою, / биючи бо ся матерски рыдаше: / Еяже молитвами, / ради благоутробия милости Твоея ущедри, / и спаси мир вземляй грех мира.

Канон Минеи, и настоящия трипеснцы по чину их, и стихословится песнь. Господина Иосифа.

Глас 1.

Песнь 3:

Ирмос: Да утвердится сердце мое:

На Кресте длани распростерл еси, простертыя древле руки Адамовы к разумному саду, отъемля грех, за милосердие щедрот, Слове Божий Преблагий.

Утверди мое помышление, колеблемое завистию змия: страстей наведения, Твоею страстию отжени пострадавый, и безстрастие верным даровавый.

Постная благодать возсия, невоздержания тьму отгоняющая: се благоприятное время, и день спасительный, покаяния покажем плоды, и живи будем.

Богородичен: Падающих исправление, сластей стремниною падша мя, и грехи лютыми впадша в пропасти, воздвигни Чистая, и к жизни настави.

Иный господина Феодора, глас 3.

Ирмос: Утверди Господи сердца наша, / и просвети к Твоему песнословию, / еже славити Тя / Спасе во век века.

Утверди Господи сердца наша Твоим Крестом, не уклоняйся от Тебе в словеса лукавая, и в деяния скверная.

Страсть Твою Владыко, небо и земля чувствующе, изменяхуся яве, Царя всех Тя показующе воистинну.

Слава, Троицен: Равночестная, безначальная Всесвятая Троице, животворящая и началосветлая Единице, Отче, и Сыне, и Душе, спаси мя.

Богородичен: Богомати безмужная, раждаеши едина Бога, не истливши девства чистоту, но пребываеши Чистая, якоже была еси прежде рождества.

Слава Тебе Боже наш, слава Тебе.

Багряней ризе Твоей, гвоздию и Кресту, губе же и копию Иисусе покланяюся, и воспеваю оживившаго вся.

Катавасия. Ирмос: Утверди Господи сердца наша, / и просвети к Твоему песнословию, / еже славити Тя / Спасе во век века.

Песнь 8.

Ирмос: Песнословцы:

Со беззаконными вменитися, за множество милости изволивый, моя грехи заглади, яко да верою Тя славлю во вся веки.

Грехов моих рукописание Твоим раздери копием, и сердца моего болезни уврачуй Господи, уязвленного стрелами злобы лукавых демонов.

Омраченное сердце мое грехом, избавлением Твоим омой, истекшею из ребр кровию Христе мой, да Тя славлю во вся веки.

Богородичен: Невозделанно прозябшая небесный клас, питающего Божественною силою всяческая Дево, насыти алчущую смиренную душу мою.

Иный.

Ирмос: В пламень ко отроком еврейским снизшедшаго, / Божию силою, / и явльшагося Господа, / священницы благословите / и превозносите во вся веки.

Радуйся Кресте, имже познася единым мгновением разбойник богословец, взывай: помяни мя Господи, во Царствии Твоем, егоже части общники нас покажи.

Ты прободен пламенное оружие отвращаеши Христе, и человеком отверзаеши паки рай: вонже входяще, Твоя безсмертная жизни присно наслаждаемся.

Благословим Отца, и Сына, и Святаго Духа, Господа.

Троицен: Со Отцем Сыну поклонимся, и Духу Святому во едином Существо, немолчно зовуще бранными усты: слава в вышних Богу в Троице.

Богородичен: Отрокораждаеши девствующи, едина Богоблагодатная, таинство великое, страшное чудо: Бога бо родила еси воплощенна, Спаса мира.

Слава Тебе Боже наш, слава Тебе.

Кресте Христов упование концев, преити нам твоим окормлением тихо, пучину добраго поста сподоби, спасая от треволнения прегрешений.

Хвалим, благословим, поклоняемся Господеви:

Ирмос: В пламень ко отроком еврейским снизшедшаго, / Божию силою, / и явльшагося Господа, / священницы благословите / и превозносите во вся веки.

Песнь 9.

Ирмос: Живоприемный источник:

Постився Елиссей воскреси умерша отрочища, якоже есть писано: и мы постящися, плотская мудрования умертвити вернии потщимся, да жизнь тамо получим.

Увы мне душе, страшное судилище, и Судиино страшное изречение! потщися покаяся, Христу примирися, тебе ради на Кресте повешенному, и избавльшему верныя осуждения.

Покаяния ми двери отверзи, страстей моих входы затвори, разбойнику вход райский благовходен показавый Христе, Твоим распятием, да славлю Твою благость.

Богородичен: Яко во глубину злобы отвержен есмь, и помышленьми сопротивными обуреваюся, демоном повинуюся, сладьми порабощен сый: помози ми Чистая Дево Мати, ко спасения пути наставляющи мя.

Иный.

Ирмос: На Синайстей горе виде Тя в купине Моисей, / неопально огонь Божества заченшую во чреве, / Даниил же Тя виде гору несекомую, / жезл прозябший, / Исаиа взываше, / от корене Давидова.

Предался еси волею, и привел еси Себе убийцам, судилищу предстал еси биемь, от рук яже создал еси: распят был еси и поруган, прободен был еси Господи, пострадал еси плотию, вся претерпев милостивно, да спасеши ны.

Ангельстии собори вострепеташа, видяще Тя на Кресте, светила свет скрыша, и трясашеся земля, колебахуся вся досаждением Твоим Господи, Божественными Твоими страстьми соделал еси нам Боже спасение.

Троицен: Существом Единица есть несекома, Пребожественная Троице, соединяема Естеством, делится Лицы свойственно: несекома бо сечется, едино сущи троится: Сия Отец есть, Сын, и Дух Живый, соблюдающая все.

Богородичен: Детородную деву кто слыша, и мать без мужа? Марие совершаеши чудо: но скажи ми, како? Не испытай глубин детородия: сие всеистинно, паче человеческого ума постижение.

Слава Тебе Боже наш, слава Тебе.

Твоею язвою вси исцелихомся от страстей грехов: на Кресте бо взят быв, острепил еси началозлобника врага: но неосужденны нас сподоби, и Воскресение достигнути, совершившия постное время.

Ирмос: На Синайстей горе виде Тя в купине Моисей, / неопально огонь Божества заченшую во чреве, / Даниил же Тя виде гору несекомую, / жезл прозябший, / Исаиа взываше, / от корене Давидова.

Светилен гласа.

На стиховне самогласен, глас 7:

Крестом Твоим Господи разрушивый смерть, / наведшуюся в мир древа ради снеди, / юже отрел еси в раи: / сам убо постом настоящим нас избави / всякия сласти душетленные, / и сподоби делати пребывающее / брашно в живот вечный: / да получим венцев нетленные сладости, / яже уготовал еси истинным постником, молимся.

Стих: Исполнимся завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Крестом Твоим Господи разрушивый смерть, / наведшуюся в мир древа ради снеди, / юже отрел еси в раи: / сам убо постом настоящим нас избави / всякия сласти душетленные, / и сподоби делати пребывающее / брашно в живот вечный: / да получим венцев нетленные сладости, / яже уготовал еси истинным постником, молимся.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Светила явишася вселенная, / всехвальнии страсотерпцы, / Христу вопиюще: / Господи, слава Тебе.

Слава, и ныне, Крестобогородичен.

Подобен: Не ктому возбраняеми:

На Древе пригвождена Тя волею, / яко виде Всенепорочная, / рыдаючи пояше державу Твою Господи.

На 6-м часе тропарь пророчества, глас 6:

Вышний на небесех живой: / создавый всякое дыхание, / спаси ны Боже: / на Тя бо уповахом Спасе наш.

Прокимен, псалом 29, глас 5: К Тебе Господи воззову, и к Богу моему помолюся.

Стих: Вознесу Тя Господи, яко подъял мя еси.

Пророчества Исаиина чтение. [Глава 5, ст. 16 – 25.]

Вознесется Господь Саваоф в суде, и Бог Святой прославится в правде: И упасутся расхищеннии яко юнцы, и пустыни плененных агнцы поядят. Горе привлекающим грехи яко ужем долгим, и яко ига юнична ремнем беззакония своя, Глаголющим: скоро да приблизатся, яже сотворит, да видим, и да приидет совет Святаго Израилева, да разумеем. Горе глаголющим лукавое доброе, и доброе лукавое, полагающим тьму свет, и свет тьму, полагающим горькое сладкое, и сладкое горькое. Горе, иже мудри в себе самих, и пред собою разумни. Горе крепким вашим, вино пиющим, и вельможам растворяющим сикер: оправдающим нечестива даров ради, и еже есть праведное праведнаго возьмлющим от него. Сего ради якоже сгорит трость от угля огненнаго, и сожжется от пламене разгоревшагося, корень их яко персть будет, и цвет их яко прах взыдет: не восхотеша бо закона Господа Саваофа, но слово Святаго Израилева раздражиша. И възъярися гневом Господь Саваоф на люди Своя, и наложи руку Свою на них, и порази их: и раздражишася горы, и быша трупы их яко гной посреде пути. и во всех сих не отвратися ярость Его, но еще рука Его высока.

Прокимен, псалом 30, глас 6: На Тя Господи уповах, да не постыжуся во век.

Стих: Правдою Твоею избави мя, и изми мя.